

An © 2016 Gannas

Gorsedh 2016

Gorsedh Kernow a vydh synsys hevlina dhe Lannaghevrán, dy Sadorn an 3^a a vis-Gwynngala, hembrenkys gans an Bardh Meur, Dr Merv Davey (dhe-woeles).



An Esedhvos a vydh synsys y'n seythun kyns – pella derivadow a-dhiworth gwasva an Orsedh.

An Gannas niver 477 mis-Gwynngala 2016 dyllys gans © Kowethas an Yeth Kernewek ISSN 1477 705X


An hav ma

Mis-Gortheren ha'n 'Jynn-den', deg meter y ughelder, ha drehevys gans Balweyth, a dremenas Kernow, owth hedhi yn ranndiryow moenek istorek.



Gwel an wasva: goldentree.org.uk

Krowseryow
gans Ray Edwards



a-dreus:

1. Yma dowr warnodho: yw (4)
3. Da dh'y weles (3)
5. Nyns yw goethus (4)
7. An blew a-ugh an dewlagas (9)
10. ... *ha tru!* (3)
11. Kul (3)
12. Pennsevik (5)
14. Kas (3)
15. Chambour managh (3)
17. An mis ma (9)
18. ... *pub el ty a esedh* (CW 47) (3)
19. Tyller dhe gavoys moen (3)
20. Heb dillas (5)
21. Kewar (3)
22. Teyrgweyth tri (3)
24. *Nos tewl yth o* (BM 3680) (9)
29. Dos nes (4)
30. Salow (3)
31. Gostyth (4)

war-nans:

1. Kav (4)
2. Bronn (3)
3. Pyth (3)
4. Unnses lavar (3)
5. *Onan* kyns hanow (3)
6. Nyns yw gwag (4)
7. *Dalghenna; Ev a* (9)
8. Rann an korf yn-dann an elgeth (9)
9. Rann ger (9)
12. Edhen teg y lost (5)
13. Tregghi gans nerth (yn Sowsnek) (5)
14. *Bos*; amser tremenys (3)
16. Drogoberer (3)
21. Ledan (4)
23. *Godhvos; My a* (4)
25. Rakhanow, 3a person liesek (3)
26. Fol (3)
27. Ogas dhe Bennsans; *Marghas* ... (3)
24. Diwweyth diwweyth dew (3)

Gorthybow dhe'n krowseryow mis-Est



argemmynn:

Gwerthji Kernewek

Keskewsel, 24 Plen an Varghas,
Ryskammel, PL32 ☎ 01840 211725
(dyghtyer **Jerri Jeffries**).

www.keskewsel.com

Lyther a Alban
a-dhiworth Yowann Byghan
(agan kesskrifer arbennik albanek)

Istori A-varr an Alban :
3. An Oesow Kres Diwetha

Wosa mernans Alexander III y'n vlydhen 1286, an unn gwiryek dhe'n wlasor, y vyrgh-wynn Margaret, leshenwys 'Maghtheth Norgagh', a verwis ynwedh. Hi re vyajyas dhe'n ynysow Orkney rag demmedhi orth Edward (a-wosa Edward II a Bow Sows), mab an myghtern Edward I (leshenwys a-wosa yn Latin *Malleus Scotorum* , po Morthol an Albanyon).

Dew wiryek a ombrofyas. David, tressa mab-wynn Alexander, re bia Yurl Huntingdon. Re bia dhodho teyr myrgh. John Balliol o mab an kynsa myrgh, ha Robert de Brus (lytherennys ha leverys '*the Bruce*' y'n dydhyow ma) o mab an nessa myrgh, ytho gwir Balliol o tamm gwell ages gwir an Bruce. Moy dhe les, ny gara Myghtern Edward a Bow Sows an Bruce vyth oll. Byttegyns, an Bruce a omdhiskleryas an myghtern gwir, ha kuntell lu. Yn 1292, Edward a dhiskleryas bos John Balliol myghtern Alban, ha'n vresel rag anserghogeth Alban a dhallathas.

Den meur y vri y'n vresel ma o William Wallace a Siorramachd Air (Ayrshire). Hembrenkyas genesik ova, den pur hir ha krev, ha skoedhyer ervirys a-barth anserghogeth Albanek. Fetha lu sowsnek a wrug dhe Bons Stirling yn 1297. An Albanyon a withas Kastell Stirling bys yn 1305, mes y'n vlydhen na lu Edward a gachyas Wallace. I a'n

kemmeras dhe Loundres, may hwrug ev perthi mernans fell ha barbarus dhe Smithfield.



William
Wallace

An Bruce a vatalyas hwhath, dres lies blydhen ha dres lies kaletter. Wor'tiwedh, dhe Vatel Bannockburn y'n vlydhen 1314, an Bruce a fethas lu Edward II. Ny wrug Pow Sows amyttya anserghogeth Alban bys yn 14 blydhen moy, mes yn gwiryonedh, yth o Alban lemmyn kenedhel rydh hag anserghek.



Robert
de Brus

Dell leveris Diskleryans Arbroath yn 1320:

'... For, as long as but a hundred of us remain alive, never will we on any conditions be brought under English rule ... It is in truth not for glory, nor riches, nor honours that we are fighting, but for freedom - for

that alone, which no honest man gives up but with life itself.'

'Rag, erna bes yn fyw namoy es kans huni ahanan, nevra ny vynnyn orth pub studh oll bos hembrenkys yn-dann rewl sowsnek ... Yn gwiryonedh nyns yw a-barth golewder, na golusogneth, nag enors yth eson ny ow patalya, mes a-barth rydhses – rag henna yn-unnik, na wra den onest vyth hepkorr saw gans bywnans y honan.'

Mis Me 1328, Edward III a amyttyas bos Alban kenedhel sovran anserghek. An Bruce, lemmyn Myghtern Robert I, a verwis mis Metheven 1329, 56 y oes.



Delow an Brus dhe Bannockburn

Servisyow Eglos dydhyasow avisys

An Revrond Chenon Jane Kneebone a dhannvon kedhlow a-dro dhe servisyow a dheu:

an 4^a mis Gwynngala Lannaghevrans Gwesperow an Orsedh, 3 eur;

an 18^{ves} mis Gwynngala, Chapel Methodek Sen Iv, Goldheys, 3 eur;

an 25^{ves} mis Gwynngala Eglos an Bluw Tresulwedhen. Goldheys 3 eur.

Pella derivadow a-dhiworth:

Rev Jane Kneebone

☎ 01637 873135

☎ 07966 703924

janekneebone@gmail.com



Hag y fydh oferenn yn Kernewek ha Latin rag Goel German yn Penneglos Truru dhe'n 3^a a vis-Hedra gans Keur an Benneglos. Pella derivadow:

ElizabethStewart@truocathedral.org.uk

Nawbedrek

A yll'ta dismygi an ger a naw lytherenn? Py lies ger a moy es 3 lytherenn a yll'ta kavoes, res yw dhis devnydhya pub lytherenn unnweyth yn pub ger ha res yw dhis devnydhya an lytherenn yn kres an pedrek yn pub ger.

K	E	L
Y	D	A
S	1	R

Gorthyp mis-Est:

keskwirhe

argemmynn:

Radyo an Gernewegva

Radyo an Gernewegva yw towlenn radyo yn Kernewek pub seythun; restrys yw gans **Matthi Clarke** ha dell leverir yth yw an gwella ilow ha kows y'gan taves kernewek. Y hyllir goslowes orth:

www.anradyo.com

An Nowodhow

Nowodhow berr yn Kernewek yw dyllys gans Radyo Kernow dhe 5 eur dy'Sul. Geryow an dowlenn a yll bos redys diworth gwiasva Kowethas an Yeth Kernewek:

www.cornish-language.org

Kesstrif Holyer an Gov Piwasow Lyennek



Diworth **Delia Brotherton**, Soedhek Keskomunyans Gorsedh Kernow, dyllys dhe'n 12^{ves} a vis-Gortheren dhe lyverji Waterstones, Truru, sywyansow y'n ugensves kesstrif lyennek Holyer an Gov 2016.

Fondys ha restrys veu an kesstrif gans Gorsedh Kernow rag skoedhya

lyvrow skrifys yn Kernow po a-dro dhe Gernow.

Kesordenores an kesstrif hevlina, Rael Harvey, a wormelas an vreusysi ha keslowena gans skriforyon an lyvrow profys.

Bardh Meur, Dr Merv Davey, a ros testskrifow ha hanafow dhe'n waynyoryon.

An ombroforion sewen dewisys yn klassow an yeth kernewek o:

klass 1.0 – lyvrow Kernewek rag dyski: an Gerlyver Poket, pennskriker Dr Ken George, dyllys gans Kesva an Taves Kernewek;

klass 1.1 – lyvrow Kernewek rag fleghes: Winni-an-Pou gans A.A. Milne, treyllys gans John Parker, dyllys gans Kesva an Taves Kernewek;

klass 1.2 – lyvrow Kernewek rag tevsogyon: Dhe Emlow an Galaksi gans Rod Lyon (a waynyas ynwedh Hanaf an Kowethas), dyllys gans Kesva an Taves Kernewek.

Rag kedhlow a-dro dhe glassow erell, lyvrow dyllys yn Sowsnek, mir orth gwiasva an Orsedh.

Ha rag pella derivadow a-dro dhe'n piwasow lyennek ma, y hyllir pellgawsel orth Rael Harvey, ☎ 01209 719321, po der e.bost dhe:

enquiries@holyerangofawards.org.uk

ha rag pella derivadow a-dro dhe Orsedh Kernow, kestav mar pleg, Delia Brotherton, Soedhek Keskomunyans, ☎ 01736 799305, po der e.bost dhe:

communications@gorsedhkernow.org.uk

Gorsedh Kernow Pibasow 2016

Ha dhe'n 2^a a vis-Est y feu dyllys gans Delia Brotherton sywyansow kesstrifow Gorsedh Kernow hy honan, rol hir anedha, hag a yll bos gwelys dhe wiaswa an Orsedh.

www.gorsedhkernow.org.uk

Gwaynyoyon an klassow yeth kernewek: Yeth Kernewek, Bardhonieth ha Yeth Plen ha Studhyans Kernewek a vydh derivys dhe solempnita an piwasow dy'Yow an 1^a a vis Gwynngala dhe Eglos Lannaghevrán, ow tallesh dhe 6 eur, avel rann an Esedhvos 2016.

Kowethas an Yeth Kernewek Taves an Tir

Y hyllir kavoes an etegves lyther-nowodhow dhiworth ragdres Taves an Tir omma:

<http://us9.campaign-archive2.com/?u=add2f8c8a90b762a3b8b60797&iid=a3b3819c92&e=2f2d57f80d>

Rag kestava orth an ragdres dannvenewgh e-bost mar pleg dhe:

tavesantir@gmail.com

Kowethas an Yeth Kernewek Kamp Hav

Bagas a beswar yonker war ugens, ynter trydhek ha hwetek bloedh aga oes, dewdhek diworth Kernow ha dewdhek

diworth Breten Vyghan, a spenas deg dydh dhe gamp hav yn koes Tehidy.

Hembrenkys gans oberoryon yowynketh, i a gevrennas aga gonisogeth ha yethow.

Restrys o gans Kowethas an Yeth Kernewek ha'n kowethas bretonek UBAPAR hag arghesys gans an towleñn a'n Unyans Europek, ERASMUS. Govenek yma synsi kamp kehalval yn Breten Vyghan y'n vlydhen a dheu.

skeusennow folenn 12.

An Loskva Nowydh

Wosa lett a bymp blydhen, ha'n kost moy es £100,000,000 an loskva re beu igerys dhe Dhinias (*St Dennis*). Leski a wra 240,00 tonnas a skoell pub blydhen ha dineythy tredan rag neb 21,000 chi.

Dres an blydhynyow krodhvol meur re beu klewys diworth tus yn Pow Pri Gwynn yn kres Kernow hag own a niver bras a gertow poes, keffrys a dhefolans ayrgylgheyk. Gelwys vydh Kresenn Dhaskavoes Nerthedh Kernewek (*Cornwall energy recovery centre*, po *CERC*). Ni a wel an pyth a hwerydyh.



gwel an loskva nowydh

Ragdres Porthkellys gans Pol Hodge

Dydh da dhywgh hwi oll. Ow hanow yw Pol Hodge hag yth ov vy Sodhek Ragdres Porthkellys.

Brassa rann an ragdres ma yw dhe dhyski yn Skol Halwynn. Dee Harris a wrug dalleth dyski an yowynkka klass – Robins (Rudhogyon mar mynn'ta!). My a dhallathas dyski Owls (Oulys) dy' Mergher ha'n kottha klass Kingfishers (Pyskadoryon an Myghtern – nebes kledhek, prag na ruwbyskers po neppyth) dy' Gwener. Wosa dalleth da Esther Johns, dyworth MSM, a dhaskorras agan Dee.



Dee hag Esther orth Skol Halwynn

An fleghes a dhyskas fest yn uskis. Ha kyns neb pell yth esa fleghes ow karma 'dydh da' ha 'fatla genes?' ha 'splann' orthiv vy ha my ow mos dres an yet. War an fordh tre y hwrug vy prederi a-dro dhe'm myrgh usi trigys yn Kembra ha leverel an kethsam lavarow dhe dus kembrek. My a borthas kov an myttin ma ow tifuna yn Fordh Ponsmeur ha skrifa hemma...

Dydh Da, Halwynn

Yn Kembra yn le leverel 'Myttin da' yn-medhons i, *bore da – good dawn!*

Ena dres agan bora yma ydhyan anwelys ow kana ha koseleth an jydh nowydh, a dhifun gans pols didermyn kyns oll an hwel hag ober.

Mes yn myttin yma an tros ... kerri ha kertow ha kytrrin kolji, ha fleghes trosek gans kerens ownek.

Yn Kembra ha Kernow dalleth an jydh yw Keltek, y'n dhiw yeth ni yth yw 'da' ha herwydh fleghes Halwynn Yth yw 'Dydh da' yn le Myttin po dohajydh po gorthugher. Ytho dydh da Halwynn!

Yn hwir, an pobel yowynk yn Skol Halwynn yw awenek.

Nessa derivas a vydh a-dro dhe bella ober yn Skol Halwynn.

Oll an gwella, Pol.

Kesva an Taves Kernewek
Apposyansow 2016

Dyllys gans **Tony Hak**, Skrifennyas
rag Apposyansow, **Kesva an Taves**
Kernewek, an 3a a vis-Est 2016.

Hevlyna y sewenas 55 ombrofyer yn
apposyansow Kesva an Taves Kernewek.
Keslowena dhedha, onan hag oll!

Kynsa Gradh: Sewen Gans Bri

Amanda Hilmarsson-Dunn, Sen Ostell
Owain Holland, Bosvenegh
Thomas Kadleck, Lyskerrys
Shaun Rennie-Plume, Kelliwik
Kensa Broadhurst, Kammbronn
William Morris, Pennsans
Yannig Laporte, Breten Vyghan

Kynsa Gradh: Sewen

James Williams, Lyskerrys
Emma Julian, Lyskerrys
Samantha Constance, Lyskerrys
Roger Bray, Tredhinas
Thomas Roberts, Tewynn Pleustri
Brian Rogers, Resrudh
Hester Rogers, Resrudh
Peter Wyper, Sen Kolomm
Barbara Wyper, Sen Kolomm
Angela Bird, Sen Ostell
Carole Catterall, Porthia
Caroline Marwood, Porthia
Linnea Glynne-Rule, Kammbronn
Jenny Worth, Lannstefan
Clive Bates, Loundres
Ashley Turner, Loundres
Susan Turner, Loundres
Lisa Crosswood, Loundres
Nigel Strick, Pennsans

Giles Pennec, Breten Vyghan

Nessa Gradh: Gans Bri

Hilary Payne, Tewynn Pleustri
Deborah Arbes, Almayn
Sue Lumley, Kelliwik
Richard Buckley, Resrudh
Jennifer Rickard, Loundres
Samuel Rogerson, Fordh Ponsmeur

Nessa Gradh: Sewen

Marion Smith, Porthia
Leslie Witham, Porthia
David Dawe, Lannstevan
Judith Vandy, Kammbronn
Helen Pascoe, Kammbronn
Wayne Tonkin, Poll
Justin Williams, Resrudh
Marie Williams, Resrudh
Andrew Toynbee, Loundres
Rachel Toynbee, Loundres

Tressa Gradh: Sewen Gans Bri

Ann Short, Sen Ostell
Andrew Bolton, Pow Belg
Mark Elton, Loundres

Tressa Gradh: Sewen

Colin Short, Sen Ostell
Duane Glasby, Pennrynn
Jamie Purves, Truru
Ashley Taylor, Lannstevan
Alice Holland, Hellys

Peswora Gradh: Sewen

Wendy Simpson, Bosvenegh
Shaun Toft, Aberfal
Dee Hunt, Hellys
Jakki Love, Pennsans


Meur ras bras ynwedh dhe eseli
Kessedhek Apposyans an Gesva a'ga

ober diwysyk.

Solempnita rag an re sewen, keffrys ha kowetha ha teylu, a vydh synsys dhe Lys Kernow dy'Sadorn an 17^{ves} a vis-Gwynngala gans an Bardh Meur ha Soedhogyon an Gesva.



Mernans yn Kylgh
hwedhel, kynsa dyllys mis-Genver
1992, gans Jowann Richards



Jowann Richards
1926-2005

John Richards yw aswonys yn ta dhe studhyoryon an yeth kernewek. Ev a skrifas bardhonegow ha hwedhlow a lies eghenn – didhanus, istorek, romansek, fantasiek – hag a veu dyllys yn rannow dre vras yn An Gannas hag a-wosa yn lyvrow berr gans Kowethas an Yeth Kernewek. Ev a dheuth ha bos bardh Gorsedh Kernow ow kemmeres an hanow bardhek Mab Roswern. Lies a'y hwedhlow re beu dastyllys gans Kowethas an Yeth Kernewek.

Raglavar

Ny wrug vy assaya kyns skrifa hwedhel kevrin-moldrans, hwedhel 'Piw a'n gwrug?' Martesen an assay ma yw kammgemmeryans bras, hag y'n kas na ny vydhav owth assaya skrifa moy a'n

par na.

Dell hevel dhymm, yma edhomm y'n eur ma a skrifow liesek aga eghenn, skrifys yn Kernewek Kemmyn, rag ri dhe studhyoryon a'gan yeth ha dhe genewegoryon skentyl ynwedh, hwedhlow didhan a yll profya praktis.

Henn yw ow askus rag skrifa an hwedhel ma, mes ynwedh, meur a blesour a'm beu orth y skrifa. Govenek a'm beus y fydh dhe les, ha martesen ev a gentrynn tus erell dhe skrifa moy ha moy yn Yeth Kernow.

Wor'tiwedh, my a vynn leverel temmyn yn kever an hwedhel ma y honan. Kyn nag yw an hwedhel gwir, heb mar, byttegyns an tyller yw pur wir; my a aswonn yn ta an dhew gylgh, ha'n eglos vrywys poran y'n kres anedha. Ha'n skila prag y feu drehevys an eglos ena yw dell leveris vy y'n hwedhel. Mes ny lavarav dhygh an le!

Jowann Richards

Chaptra Onan

Yn-dann loer leun a-ugh y'n nev, yth esa an kommel brywys ow fistena a-dherag gwyns skav. Yth esa skeusow an kommel ow sommys a-dreus tir arghans, ow fyski yn tell hag a-dro dhe garregi, kepar ha logos. A-dherag pellder an ebron dewl, y sevi magoryow eglos koth hwath tewlla. Serth o an fosow, mes an linennow re bia medhelhes ha mygys der ydhyow. Nans o termyn hir to an eglos re goedhsa yn termyn nos wyls, garow - an keth hager awel na, yn hwir, a wrug terroes dres oll an rannir, ha ladha pypm den y'n dreveglos.

Oll a-dro dhe'n eglos, yth esa fosynn

isel, gwrys a weres, lemmyn kudhys dre wels. An fosynn re bia gwrys yn furv kylgh meur, hag a-ves hag a-dro dhodho, yth esa kylgh arall. Eglos Kristyon (po an rann anedhi o gesys) yn kres templa a gryjyans kottha - kryjyans pagan agan hendasow. Kentrevogyon nebes anes, martesen; kowetha gweli koynt, yn sur.



Dr. Andrew Pearse a esedhas orth y dhesk, ha mires orth an raghell a lytherow warnodho. Ev a hanasas. Y fia ena niver a lytherow ow hwilas gwertha stoff heb les-vydh, heb mar, ha lytherow ow profya chiohw havysi yn Spayn, hag erell. Flows, flows, flows. Ev a dhrehevis y dhewlagas, ha lagatta adreus gwels ha gwydh an kampus. Splann o an bennskol yn golow an myttin, mes yth esa y vrys ow kwandra. Da via, yn hwir, mones unnweyth arta 'y'n mes' owth oberi war gleudhyans hendhyskoniethel, mes y'n termyn ma arghans re goedhsa skant, ha nys esa tybyans vyth rag an hav o ogas lowr hag a gost isel lowr dhe vos dhe les. Ev a omdreylyas arta dh'y lytherow.

Heb mar, yth esa y'ga mysk lytherow yn kever y soedh avel dyskador hendhyskonieth; paperyow dhe redya hag ewna diworth y dhyller, ha notennow diworth tus erell yn y bennskol.

Ena, ev a attendyas bos unn lyther, ha trigva warnodho leuv-skrifys. An merkpost o Tregannis, treveglos vyghan neb seyth ugens mildir a-ves. Dre bols byghan, ny ylli ev tybi prag yth heveli bos an hanow godhvedhys yn ta dhodho.

Ena, ev a govhas; ogas dhe Dregannis yth esa kylghyow gweres, hag eglos ynna. Yth esa neb unn den ena a wodhya meur yn kever hendhyskonieth an ranndir. Pyth o y hanow?... Cottrell... Cattrell...na, Collett, Edward Collett, henn o an polat. Nebes lytherow yntredha, nans o termyn hir, dell grysi, hag ev re dheuth er y bynn dhe geskusulyans yn bennskol Karesk. Dhe wir, henn o an den.

Pearse a igoras an lyther. Yn sur, diworth Edward Collett ev a dheuth. Yth esa an lyther y honan, ha ganso folenn A3, ha warnedhi mappa an kylghyow ha'n eglos linennys gans meur a rach. Ober konnyk yn hwir o henna. Dhe wir, henna a akordyas gans y govath a'n den. Kempenn, pur gempenn. Ev a dhallathas redya an lyther.

*An Gystenn,
Fordh Veur,
Tregannis.
Ebril 3, 19***

Dr. Pearse ker,

Martesen ty a borth kov ahanav. Ni a vetyas dhe Bennskol Garesk nans yw termyn hir dhe'th areth splann 'Aspects of Beaker Folk Culture'.

Wel, my a skrif lemmyn yn kever an kylghyow ha'n eglos usi ogas dhe'n dreveglos ma - ty a woer a-dro dhe'n le yn ta, sur ov vy. My a ober war istori a'n ranndir ma nans yw termyn hir, hag yn mysk ow studhyansow yma nn kylghyow y'n kres, heb mar.

Lemmyn, neppyth re wrug hwarvos, yw pur dhe les dhymmo vy; perghennek an tir ha'n kylghyow warnodho re assentyas dhe gleudhyans a'n tyller rag studhyans hendhyskoniethel. My re gusulyas ty dhe vos

an gwella den rag an ober, ha'n perghennek,
Peter Fry, yw unnver genev.

Rag henna, my a skrif dhe wovynn mars
yw an torn dhe les. My a wayt y fydh an
tybyans da dhe'th vrys. My a dhannvon gans
hemma mappa hag a linennis vy, dhe ri
nebes derivadow pell a-dro dhe'n tyller.

Mar pleg, pellgows dhymm, ha ni a yll
settya kuntell.

Gans ow gorhemmyrnadow a'n gwella,

Edward Collett.

Andrew Pearse a ystynnas y leuv ha
kemmeres an pellgowser yn-bann.

argemmynn: Kowethas an Yeth Kowsva 2, Rysrudh

Trigva Kowsva yw 6 Artists' Muse,
Krestiryow/Heartlands, Rysrudh TR.

An gwerthji nowydh, Kowsva 2, a
veu igerys dhe'n 23^a a vis-Est gans kyns
Bardh Meur, Mick Paynter. Ev a droghas
snod a vrithenn gernewek a-rag bagas
bras a eseli hag a skoedhoryon an
Kowethas.



kyns Bardh Meur, Mick Paynter, orth an daras

Gwerthow a lyvrow hag erell yn

Kernewek a yll bos prenys ena ha chons
dhe gavoës blas a Gernewek keffrys ha
shoppow-ober restrys heb kost a dermyndhe
dhe dermyndhe ha kedhlow a-dro dhe
Gernewek.

Kowsva a vydh igerys pub Lun,
Mergher, Gwener ha Sadorn ynter deg
eur hag unn eur dohajydh ha dhe
brysyow erell mars eus hwarvos
arbennik.

Peub a dhegemmer dynnargh
kolonnek mar mynnir dos.



bagas bras a dus a dheuth dhe'n igeryns

An Gannas

Govynn: eus nebonan a'n jeves an
kynsa dyllans (mis-Kevardhu 1967)? Da
via genen gul dasskrifow anodho.


Yma Keith Syed ow ri y dhasskrifow
koth dhe'n Kowethas, niverow 1977 dhe
2012 kelmys mes ny'n jeves niverenn
onan!

Y hyllir gweles dasskrifow koth An
Gannas, 2010 dhe 2015 war wiasva an
Kowethas:

<http://cornish-language.org>

Kamp Hav 2016

Skeusennow an dus yowynk, ha Bretonek ha Kernewek (folenn 6).



An Gerlyver Poket:

Dyllys gans Kesva an Taves ha sewen y'n kesstrif lyennek 2016.

An Gannas 2016

An Gannas yw dyllys pub mis gans Kowethas an Yeth Kernewek. An Skrifennyas yw Tim Hambly, 12 Stret an Duk, Lannstevan Wartha, Kernow, PL15 8HD ☎ 01566 773716:

skrifennyas@btinternet.com

Pennskrifur An Gannas yw Graham Sandercock hag yw lowen degemmeres erthyglow ha skeusennow dhe vos dyllys:

grahamsandercock@blueyonder.co.uk



